

## D' Sag vo da Isariad - Goass

Vor mänga Johra häad amol an Kämmifäager z'Muntlaga z'toa kaa. Alawill, wenn er a kli z'vill is Glas gluagat häad, so häad er aagfoche öber a Härrgott spöttla und fluecha. Sini Seal isch drumm so schwarz gsii wie sis Hääs.

So ischt är o wieder amol erber lang innere Weatschaft hocka bleaba. Voross ischs scho tunkil wora. Entlich isch de Kämmifäager uufgschtanda ond häad wella hoa gi Tipildsou. Da Wäag häad dozmol uf am Krüzdamm zmittscht durs Isaried dori gfüart. "Öör söttid iatzt z'Muntlaga übarachte," hond eam d'Lüt zuagret, "mit derga gwaggliga Böaner ischs vill z'gföarlig, im Tunkla no gi Tipildsou wella z'goa." "Waa, z'Muntlaga googa," häad är gseed und häad prallat: "Mear föarchts nöd, nöd amol dänn, wenn dar Tüüfil läabtig käämt!" Alls goat Zuareda häad nüüt gnützt und er ischt abzottlat.

Da Kämmifäagar ischt earscht a Schtuck undar da Letzou gsii, do seacht är zmoool a schneeawiissi Goass vor eam sctoa. "Wat, du Krüzkog, i will dear, mear da Wäag verschpear!" häad är gröölat. Er häad mit sim ruassaga Keerwüsch wild um sich gschlaga bis d'Goass über a Krüzdamm abi gjuckt und im tunkla Isaried verschwunda ischt.

Kumm ischt dä Schpuck vorbii gsii, do sctocht plötzlich ganz broatschpuurig, wie us am Boda gwaggsa, an aalte Goassbock zmeatscht im Wäag hinn. Dä häad a so gförchig und grüüsig usgsäacha, ass sogar da Kämmifäager Gääs öberko häad de ganz Rugga doruuf. "Das künnt bigott da Tüüfil sii," häad er tenkt. Wie an Varruckta häat das Viich aagfoocha, mit da Huufa uusschlaga und ischt uf da varschrocka Maa loosgrännt und häad an mit da spitzaga Hörnar traktiert. Da Kämmifäager häad luut Schröa loa und Hilfordio grüaft, ass ma's bis is Tännali ui ghört häad.

Do seand a paar Manna mit Fackla uf am Krüzdamm dorabgschprunga. Wo's a Schtuck undar da Lätzou gsii seand, häad das Gschroa of zmol uufghöart. Im schwacha Facklaschii hond's gsäacha, wie an mächtige Goassbock daviuschpringt und i da Nacht verschwindt. Vom Kämmifäager aber hond's ga no a paar Fäatza vo sim schwarza Hääs und d'Loatara gfunda.

No hüt rüafid d'Möattara drum z'Muntlaga da Goascha am Obad, wänn's iinachtet: "Kond woadli ina, susch holt eu dänn d'Isariad - Goass!"